

Broj: 01-02-3-1409/16
Sarajevo, 18.07.2016. godine

Z A P I S N I K
12. REDOVNE SJEDNICE PREDSTAVNIČKOG DOMA PARLAMENTA
FEDERACIJE BiH, održane 13.07. i 08.11.2016. godine

Sjednica je počela u 10.47.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, predstavnike Međunarodne zajednice, kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Mirsad Kukić, Mujo Hasić, Mahir Mešalić, Hajrudin Havić, Faruk Ćupina, Ilhan Bušatlić, Hasan Muratović, te ministri Martić i Vujanović a kašnjenje je najavio Rasim Omerović.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici 9. i 11. redovne i 12. vanredne sjednice usvojeni su bez primjedbi.

Prešlo se na izjašnjavanje o podnesenim inicijativama.

Davor Vuletić pokrenuo je inicijativu za usvajanje Preporuke Tužilaštvu Federacije BiH da u okviru svojih kapaciteta i zakona koji reguliraju njegov rad u narednom periodu usmjeri svoje aktivnosti na pokretanje istražnih postupaka u slučajevima neplaćanja doprinosa za Fond PIO i Zavoda za zdravstveno osiguranje od javnih preduzeća i javnih ustanova Federacije BiH te preduzeća u kojima Federacija BiH ima većinsko vlasništvo, ali ona nije usvojena (36 glasova za, osam glasova protiv i 28 uzdržanih glasova).

Sanel Razić pokrenuo je inicijativu, u skladu sa programom mjera i aktivnostima za unapređenje sigurnosti saobraćaja na cestama kojim, shodno povjerenim nadležnostima upravlja, pa traži od Javnog preduzeća Ceste Federacije BiH da na dionici magistralnog puta M-18 na dijelu Podgajevi - Đurđevik (općina Živinice) u 2016. godini pristupi planiranju i izgradnji jednostrane staze za pješake od centralne Javne ustanove Osnovna škola "Đurđevik" do područne škole na lokalitetu MZ Podgajevi, koja nije usvojena (22 glasa za, 11 glasova protiv i 37 uzdržanih glasova).

Klub zastupnika SDP pokrenuo je inicijativu za održavanje vanredne sjednice Predstavničkog doma Parlamenta Federacije BiH sa jednom tačkom dnevnog reda – Stanje u Federalnom zavodu penzijsko-invalidskog osiguranja sa prijedlogom mjera za prevazilaženje problema sa isplatom penzija - koja nije usvojena (34 glasa za, sedam glasova protiv i 24 uzdržana glasa).

Dževad Adžem pokrenuo je inicijativu za sazivanjem tematske sjednice koju će pripremiti federalna ministrica obrazovanja u saradnji sa deset ministara obrazovanja iz kantonalnih vlada i Brčko Distrikta, na temu "Reforma obrazovanja", ali ona nije usvojena (34 glasa za, 14 glasova protiv i 16 uzdržanih glasova).

Rusmir Mesihović pokrenuo je inicijativu za izmjene i dopune Zakona o lijekovima i medicinskim sredstvima, koja nije usvojena (33 glasa za, šest glasova protiv i 28 uzdržanih glasova).

Prešlo se na izjašnjavanje o dobivenim odgovorima.

Nermin Nikšić kazao je da nije zadovoljan dobivenim odgovorima. Damir Mašić djelimično je zadovoljan sa dva odgovora, dok trećim odgovorom nije zadovoljan a tiče se Strategije za mlade koja već godinu pripremljena stoji u Federalnom ministarstvu kulture i sporta, te apelira da se pusti u proceduru. Odgovorima su zadovoljni ili djelimično zadovoljni: Vesna Švancer, Mensud Borović, Slavica Josipović i Jasna Duraković-Hadžiomerović. Saša Mitrović nije zadovoljan odgovorom na pitanje koje je postavio Federalnom ministarstvu rada i socijalne politike. Dennis Gratz nije zadovoljan odgovorima na postavljena pitanja. Mira Ljubijankić nije zadovoljna odgovorom na pitanje koje je postavila ministru Drljači, a tiče se broja javnih ustanova koje su ispoštovale Zakon o zapošljavanju invalida u Federaciji BiH. Ministar je uputio na Fond, te ona isto pitanje upućuje i Fondu. Jasmina Zubić nije zadovoljna odgovorima na pitanja, te ih je komentarisala. Također, kazala je da je nedavno u Parlamentu Federacije BiH bila upriličena posjeta Udruženja „Damar omladine“ iz Visokog. Inicira da zastupnici budu obaviješteni kada nevladin sektor najavi posjetu kako bi se mogli upoznati sa procedurama i radom Parlamenta. Smatra da se ubuduće takvi propusti ne bi smjeli dešavati. Jusuf Bubica kazao je da nije zadovoljan ni sa jednim odgovorom. Zukan Helez nije zadovoljan odgovorima. Odgovorima su zadovoljni ili djelimično zadovoljni: Davor Vuletić, Dževad Adžem, Mehrudin Švago, Kasim Mulalić, Azra Hadžić, Zana Marjanović i Hasida Isaković. Esad Bašagić nije zadovoljan odgovorom koji je dobio od Direkcije cesta Federacije BiH. Jozo Bagarić nije zadovoljan odgovorima, te će pitanja obnoviti.

Poslanička pitanja

Damir Mašić, u ime Kluba zastupnika SDP, predlaže da se zastupnici izjasne o zaključku da se van snage stavi novousvojeni Pravilnik o primjeni Zakona o porezu na dohodak.

Pitanje je uputio Vladi Federacije BiH – budući da je Zakonom o Vladi i drugim imenovanjima predviđeno privremeno imenovanje na rok od maksimalno 90 dana, a znajući da neki ljudi vrše dužnost po godinu, bez da je provedena procedura pita - koliko trenutno ima imenovanih direktora na rok 90 dana, a oni evidentno vrše tu dužnost duže, koja su to lica i u kojim preduzećima i upravnim organizacijama?

Drugim pitanjem taži od predsjedavajuće Doma naroda Lidije Bradara da se 18 Zakona koji se drže u Domu naroda puste u proceduru.

Pita rukovodstvo Predstavničkog doma šta je sa desetom redovnom sjednicom koja nije dovršena i planira li se održati.

Zukan Helez pitanje je uputio ministrici Jelki Milićević - da li su tačni navodi pojedinih medija da je glavni razlog donošenja Zakona o igrama na sreću uvođenje austrijske firme „Novomatic“ na tržište BiH?

Enver Bijedić pitanje je uputio Federalnom ministarstvu prometa i komunikacija, odnosno Javnom preduzeću Ceste Federacije – kada će završiti izgradnju zapadnog ulaza u Tuzlu, odnosno spoj završne petlje Šićki Brod sa dionicom bolnice Kreka u Tuzli?

Pokrenuo je inicijativu koja se odnosi na produženje roka važnosti potvrde o registraciji vozila na stanicama tehničkog pregleda.

Narednom inicijativom traži da se omogući registracija vozila na period kraći od godinu jer postoje vozila koja se ne uporebljavaju tokom cijele godine a nije ih moguće registrirati na kraći period.

Sljedeća inicijativa odnosi se na plaćanje police osiguranja od obaveza autoodgovornosti na period kraći od godinu vezano uz skraćeni period registracije.

Boro Krišto pitanje je postavio Upravi za indirektno oporezivanje – da li je Rudnik Tušnica bio najveći dužnik i postoje li preduzeća sa većim dugom na osnovu PDV u Federaciji BiH i kada će na isti način od tih dužnika biti naplaćen dug po osnovu PDV?

Drugo pitanje uputio je Federalnom ministarstvu prometa i veza, odnosno ministru Lasiću - na listi kapitalnih investicijskih projekata za Federaciju BiH u sektorima poljoprivrede, energetike i industrije, prometa i turizma, zaštite životne sredine našao se i Projekt modernizacije i ubrzanja magistralne ceste Mostar - Široki Brijeg – Posušje – Tomislav-Grad - Livno za čiju realizaciju je potrebno osigurati 89.000.000 KM, a za čiju izgradnju su potrebne tri godine – pita ministra da li su ovi navodi tačni? Budući da je na klupama Strategija razvoja prometa, kaže da se u njemu ne nalazi projekt za ovaj prometni pravac.

Mensud Borović pitanje je uputio Federalnom ministarstvu finansija – zašto u Bosansko-podrinjskom kantonu nisu doznačena sredstva iz Budžeta Federacije BiH za 2016. godinu sa ekonomskog koda 6141 - Tekući transferi drugim nivoima vlasti, kantoni i općine?

Amra Kunovac pitanja je uputila Federalnom ministarstvu rada i socijalne politike. Naime, Ministarstvo je dostavilo Vladi informaciju o problemu smještaja osoba sa duševnim smetnjama u ustanove socijalne zaštite, kao i informaciju o radu radne grupe za analizu tog problema i prijedlog zaključaka o daljnjim aktivnostima vezanim uz rješavanje problema smještaja osoba sa duševnim smetanjama u ustanove socijalne zaštite. Da li je Vlada razmatrala dostavljene informacije i zauzela stav za rješavanje problema? Traži informaciju o daljnjim aktivnostima te radne grupe. Na koji način zaštititi prava i interese tih osoba koje su bez porodičnog staranja? Postavlja pitanje daljnje nadležnosti zbrinjavanja osoba sa duševnim smetnjama.

Alma Arnaut dva pitanja uputila je Vladi Federacije BiH.

Koliko je Vlada Federacije BiH, na osnovu vraćanja kredita, plaćanja kamata, te plaćanja izgubljenih sudskih sporova, isplatila novca tokom 2015. godine i u prvih šest mjeseci 2016. godine?

Drugo pitanje - od Vlade traži dostavljanje izvoda koliko su od uspostavljanja aktuelne vlade, zaključno sa 12.07.2016. godine, Vlada, ministri i njihovi pomoćnici, sekretari i savjetnici potrošili na službena putovanja u BiH i u inozemstvo?

Vjekoslav Bakula inicira da se zastupničke klupe označavaju u skladu sa njihovim nazivima. Pitanje je uputio predsjedavajućem Predstavničkog doma Edinu Mušiću vezano uz uzurpaciju imena na pločicama na kojima su imena stranaka?

Amra Haračić uputila je zahtjev Federalnom ministarstvu rada i socijalne politike, te traži tumačenje člana 22. Zakona o radu. Da li se u pogledu ispunjavanja ovih uvjeta i Zakona o radu Federacije BiH član 22. - zasnivanje radnog odnosa na neodređeno vrijeme - uzimaju u obzir i ugovori o radu sklopljeni prije stupanja na snagu ovog zakona ili se u obzir uzimaju samo ugovori o radu sklopljeni nakon stupanja na snagu ovog zakona?

Dževad Adžem pokrenuo je inicijativu koja se odnosi na prebacivanje granta iz treće tranše stand by aranžmana na Bosansko-podrinjski kanton.

Drugo inicijativa vezana je uz izgradnju brze ceste do Goražda.

Jasmin Kadić pitanje je uputio Federalnom ministarstvu energije, rudarstva i industrije i Federalnoj poreznoj upravi – kolike su obaveze rudnika uglja u Federaciji BiH na osnovu obračunatih a neuplaćenih javnih prihoda u periodu primjene Zakona

o finansijskoj konsolidaciji rudnika uglja, doprinosi za PIO, zdravstveno osiguranje, osiguranje od nezaposlenosti od 2009. do 2015. i do 30.06.2016. godine, a radi se o tekućim obavezama nastalim u periodu koji Zakon nije obuhvatio.

Pokrenuo je inicijativu prema Vladi Federacije BiH i Federalnom ministarstvu energije, rudarstva i industrije i traži da se Predstavničkom domu dostave izvještaji o poslovanju privrednih društava iz oblasti rudarstva u 2015. godini u kojima je većinsko učešće državnog kapitala i rudnika, koji se nalaze u sastavu koncerna Javnog preduzeća Elektroprivreda BiH.

Slavica Josipović pitanje je uputila Tužilaštvu BiH – šta je sa predmetima koji se odnose na ratne zločine in a progon 80.000 Hrvata na prostoru srednje Bosne. Traži od Tužilaštva odgovor u vezi sa ubistvima 12 djece u Vitezu, Križančevom selu i Buhinim kućama, također pita šta je sa procesuiranjem zločina nad Hrvatima na području Općine Travnik, mjesto Maline i Bikoši gdje se još traže nestali Hrvati njih 21, ubijeni 1993. godine?

Boris Marjanović pitanje je uputio Javnom preduzeću Ceste Federacije – šta se planira poduzeti da bi se riješile prometne gužve na dvije raskrsnice, jedna je prema bolnici Nova Bila i druga prema Zenici na potezu Zenica – Vjetrenica.

Jasmina Zubić kazala je da je u Izvještaju o poljoprivredi za 2014. godinu u preporukama piše da je potrebno inicirati donošenje zakona o izmjenama i dopunama Zakona o stvarnim pravima a radi se o članu 338. kojom bi se utvrdilo da se odredbe ovog zakona ne odnose na poljoprivredno zemljište u državnom vlasništvu. Pita ministra – da li je priprema ovih izmjena u toku?

Naredno pitanje uputila je Ministarstvu vanjske trgovine i ekonomskih odnosa – da li je Ministarstvo pokrenulo aktivnosti za dosljednu primjenu carinskih propisa a po zahtjevu slobodne zone Visoko i Preventa kao najvećeg korisnika kako bi korisnici slobodne zone bili stimulisani da nastave poslovanje u slobodnoj zoni?

Sljedeće pitanje uputila je Zavodu zdravstvenog osiguranja Zeničko-dobojskog kantona – da li su upoznati sa teškim stanjem u dijaliznom centru, te šta poduzimaju da se poboljšaju uvjeti pružanja zdravstvenih usluga u dijaliznom centru u Visokom?

Posljednje pitanje uputila je nadležnom ministarstvu a odnosi se na Zakon o koncesijama – kada će se na dnevnom redu Doma naći Prijedlog Zakona o koncesijama, budući da je u prethodnom sazivu usvojen u formi nacрта u oba doma?

Mira Ljubijankić pitanje je uputila Fondu u vezi sa plaćanjem 25% prosječnog dohotka za nezaposlene invalide u Federaciji.

Pita Vladu Federacije BiH da li je imenovanje predsjednika Nadzornog odbora Federalnog zavoda za zapošljavanje Nedžada Jusića direktni sukob interesa i klasični primjer nepotizma, budući da je on sestrić potpredsjednice Federacije? Potpredsjednica Federacije dala je odgovor na ovo pitanje.

Ponovo upućuje pitanje Željeznicama Federacije - kada će krenuti voz na relaciji Sarajevo - Bosanski Novi - Bihać?

Radoslav Luburić pitanje je uputio Federalnoj poreznoj upravi – koliko je sistematizirano i popunjeno radnih mjesta u Sarajevu te koja je nacionalna struktura zaposlenih.

Drugo pitanje uputio je premijeru Vlade Federacije BiH - zašto nje potpisao pismo namjere prema MMF-u kada ga je usaglasilo Fiskalno vijeće BiH koji čine entitetski ministri finansija, predsjednici vlada, državni ministar finansija i predsjedavajući Vijeća ministara BiH, budući da je u budžetu planirano zaduživanje od MMF-a i da li je nađen neki drugi izvor finansijskih sredstava.

Jasna Duraković-Hadžiomerović pokrenula je inicijativu prema Federalnom ministarstvu zdravstva da u saradnji sa kantonalnim ministarstvima zdravstva izda

neku vrstu direktive ili uredbe da se u zavodima za zdravstvenu zaštitu žena i materinstva svim pacijentima omoguće besplatni ginekološki pregledi, pogotovo u manjim ruralnim sredinama i to u terminima koji će biti zakonski regulirani, odnosno minimalno četiri dana mjesečno, po jedan dan u sedmici. Također da se zakonski uredi da domovi zdravlja pružaju i besplatne zdravstvene savjete jednom sedmično, sa naglaskom na savjetodavne razgovore sa mladim ljudima na temu seksualnog i reproduktivnog zdravlja sa zagaraniranom diskrecijom.

Dva pitanja uputila je Federalnom ministarstvu obrazovanja i Federalnom ministarstvu zdravstva – da li ova dva ministarstva namjeravaju predložiti kantonalnim ministarstvima za obrazovanje i nauku uvođenje obaveznog predmeta o seksualnom i reproduktivnom zdravlju u osnovne i srednje škole u svim kantonima? Da li oni namjeravaju raditi na projektu programa obrazovanja uvođenjem ove vrste edukacije (seksualno i reproduktivno zdravlje) i otvaranjem dostupnih senzibilnih i povjerljivih savjetovališta za mlade u saradnji sa srednjim školama i zdravstvenim ustanovama, koja bi uključivala volonterske servise vršnjačkih savjetnika.

Midhat Karović pita kada će biti imenovan Nezavisni odbor i Odbor za žalbe građana?

Nermin Nikšić pitanje je uputio Vladi Federacije BiH, resornom ministarstvu i Elektroprivredi BiH - šta čine da spriječe odlazak velikih kupaca iz Elektroprivrede? Da li je Vlada upoznata sa činjenicom da se ovlašteni trgovci električnom energijom pojavljuju sa ponudama kupcima i fakturama koje Elektroprivreda isporučuje tim kupcima i umanjuju cijenu električne energije?

Mirza Ganić pitanje je uputio Federalnom ministarstvu poljoprivrede, vodoprivrede i šumarstva – koliko se duguje proizvođačima mlijeka u Federaciji BiH sa osvrtom na prethodne i tekuću godinu, te da li je moguće poboljšati dinamiku plaćanja na način da se poticaji isplaćuju kvartalno?

Dennis Gratz postavio je pitanje vezano uz Zakon o finansijskoj konsolidaciji rudnika, koji je na dnevnom redu današnje sjednice. Podsjetio je da je Poreska uprava zbog dugovanja PIO i poreza na plaću blokirala račune sedam rudnika u Federaciji što je dovelo rudare u neizvjestan položaj. U obrazloženju Zakona kaže se da je napravljena neka tehnička greška, pa pita kako je došlo do nje i hoće li se pokrenuti istražni postupak za eventualno utvrđivanje odgovornosti i da li je odluka Poreske uprave zasnovana na pogrešnom budžetu?

Postavio je još jedno pitanje Ministarstvu – da li je moguće prijenosom sredstava iz Elektroprivrede isplatiti plaće i doprinose rudarima, budući da rudnici pripadaju koncernu Elektroprivrede?

Mehrudin Švago ponovio je ranije postavljeno pitanje, kojim od Ministarstva unutrašnjih poslova Srednjobosanskog kantona traži informaciju koliko ima zaposlenih u ovom ministarstvu po općinama i koja je nacionalna struktura, kao i funkciju zaposlenika, a podatke traži za svaku policijsku upravu pojedinačno.

Prijedlog dnevnog reda zastupnici su dobili uz poziv za sjednicu.

Vlada Federacije BiH dostavila je u parlamentarnu proceduru Prijedlog Zakona o izmjenama i dopuna Zakona igrama na sreću po hitnom postupku, te traži da se uvrsti u dnevni red današnje sjednice.

Damir Mašić predložio je zaključak (Predstavnički dom Parlamenta Federacije BiH obavezuje Vladu Federacije BiH da hitno stavi van snage nedavno usvojene izmjene Pravilnika o primjeni Zakona o porezu na dohodak), koji nije usvojen (25 glasova za, devet glasova protiv i 31 uzdržani glas).

U raspravi o izmjenama i dopunama dnevnog reda učestvovali su: Azra Hadžiahmetović, Davor Vuletić, Dario Knezović, Dženan Đonlagić, Ismet Osmanović, Elvir Karajbić, Dennis Gratz, Alma Kratina, Boris Barun, Damir Mašić, Jasmina Zubić, Amra Haračić i Alma Kratina.

Predsjedavajući je dao pauzu 20 minuta, budući da Odbor za boračka i invalidska pitanja zasjeda sa delegacijom Savjeta branitelja u Federaciji BiH, te da se nakon pauze izjašnjava o izmjenama i dopunama dnevnog reda.

Nakon pauze, Dženan Đonlagić postavio je nekoliko pitanja u vezi sa Prijedlogom Zakona o izmjenama i dopunama Zakona o igrama na sreću, na što mu je premijer Novalić dao odgovore.

Prešlo se na izjašnjavanje u vezi sa izmjenama i dopunama dnevnog reda.

Sa 69 glasova za, uz 12 glasova protiv i bez uzdržanih glasova, usvojen je prijedlog Vlade da se u dnevni red uvrsti tačka – Prijedlog Zakona o izmjenama i dopunama Zakona o igrama na sreću.

Sa 66 glasova za, uz 13 glasova protiv i uz tri uzdržana glasa, usvojen je prijedlog da se Prijedlog Zakona o igrama na sreću razmatra po hitnom postupku.

Elvir Karajbić je, u ime Kluba zastupnika SDP, predložio da se u dnevni red uvrsti tačka – Prijedlog Zakona o liječenju neplodnosti biomedicinski potpomognutom oplodnjom – koji, na osnovu pojedinačnog izjašnjavanja, nije usvojen (49 glasova za, 11 glasova protiv i 24 uzdržana glasa).

Prijedlog Azre Hadžiahmetović da se u dnevni red uvrsti tačka – Deklaracija o osudi govora mržnje, usvojen je (51 glasom za, 10 glasova protiv i 18 uzdržanih glasova).

Predsjednik Odbora za boračka i invalidska pitanja dao je kratko obrazloženje u vezi sa sastankom koji je održan sa Savjetom branitelja u Federaciji BiH.

U ime Kluba zastupnika HDZBiH Dario Knezović predložio je da se 1. tačka - Prijedlog Zakona o poljoprivrednoj organskoj proizvodnji - skine sa dnevnog reda, što nije usvojeno (19 glasova za, 43 glasa protiv i 21 uzdržani glas).

U ime Kluba zastupnika HDZBiH Dario Knezović predložio je da se 2. tačka - Nacrt Zakona o šumama - skine sa dnevnog reda, što nije usvojeno (18 glasova za, 50 glasova protiv i 15 uzdržanih glasova).

U ime Kluba zastupnika HDZBiH Jozo Bagarić zatražio je pauzu 30 minuta.

Nakon pauze, nastavio se rad.

Prijedlog Ismeta Osmanovića, u ime Kluba zastupnika SDA, da se sa dnevnog reda skine 10. tačka - Nacrt Zakona o premjeru i registraciji nekretnina - što pojedinačnim izjašnjavanjem nije usvojeno (40 glasova za, 35 glasova protiv i šest uzdržanih glasova).

Predsjedavajući je pozvao zastupnike da se izjasne o zaključku, koji je, u ime Kluba zastupnika DF, predložio Davor Vuletić da se na današnjem zasjedanju razmatraju teze za izradu Nacrta Zakona o koordinaciji u procesu evropskih integracija u Federaciji BiH, što nije usvojeno (32 glasa za, 27 glasova protiv i 20 uzdržanih glasova).

Sa 62 glasa za, uz 13 glasova protiv i uz pet uzdržanih glasova, usvojen je sljedeći:

DNEVNI RED

1. Prijedlog Zakona o izmjenama i dopunama Zakona o igrama na sreću – hitni postupak,
2. Prijedlog Zakona o poljoprivrednoj organskoj proizvodnji,
3. Prijedlog Zakona o izmjenama Zakona o konsolidaciji rudnika uglja u Federaciji BiH prema obračunatim a neuplaćenim javnim prihodima od 2009. do 2015. godine,
4. Prijedlog Zakona o izmjenama i dopunama Zakona o istraživanju i eksploataciji nafte i plina u Federaciji BiH,
5. Prijedlog Zakona o izmjenama i dopunama Zakona o volontiranju u Federaciji BiH (predlagač: Klub zastupnika SDP) – skraćeni postupak,
6. Nacrt Zakona o prijevozu opasnih materijala,
7. Nacrt Zakona o Gradu Goražde,
8. Nacrt Zakona o Gradu Cazinu,
9. Nacrt Zakona o Gradu Livnu,
10. Nacrt Zakona o šumama,
11. Nacrt Zakona o premjeru i registraciji nekretnina,
12. Deklaracija o osudi govora mržnje (predlagač: Azra Hadžiahmetović),
13. Prijedlog Odluke o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj (IFAD) za realizaciju Projekta program razvoja ruralne konkurentnosti (RCDP),
14. Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj (OFID) za realizaciju Projekta razvoj ruralnog poduzetništva,
15. Prijedlog Odluke o davanju saglasnosti na izvještaje:
 - Izvršenje Finansijskog plana Zavoda zdravstvenog osiguranja i reosiguranja Federacije BiH za 2015. godinu (konsolidovani),
 - Izvršenje Finansijskog plana Federalnog fonda solidarnosti za 2015. godinu (Anex I.),
 - Izvršenje Finansijskog plana Stručne službe Zavoda zdravstvenog osiguranja i reosiguranja Federacije BiH za 2015. godinu (Anex II.),
16. Prijedlog Strategije prometa u Federaciji BiH za period 2016.-2030. godina,
17. Izvještaj o odobravanju izdvajanja sredstava iz „Tekuće rezerve“ Budžeta Federacije BiH za 2015. godinu za period 1.1. - 30.6.2015. godine,
18. Izvještaj o zaduženju Federacije BiH na osnovu emisije trezorskih zapisa,
19. Godišnji plan zaduženja za 2016. godinu i Kvartalni izvještaj o dugu Q4/2015,
20. Kvartalni izvještaj o dugu Q1/2016,
21. Informacija o vanjskom i unutrašnjem dugu u Federaciji BiH na 31.12.2015.,
22. Usaglašavanje tekstova zakona različito usvojenih u domovima Parlamenta Federacije BiH,
23. Izbori i imenovanja.

1. Prijedlog Zakona o izmjenama i dopunama Zakona o igrama na sreću – hitni postupak

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je premijer Fadil Novalić.

U raspravi su učestvovali: Vjekoslav Bakula, Ismet Osmanović, Nermin Nikšić, Jozo Bagarić, Dario Knezović, Slavica Josipović, Elvir Karajbić, Adežm Dževad, Ramiz Meša, Dario Knezović, te premijer Fadil Novalić.

Sa 67 glasova za, uz 11 glasova protiv i uz tri uzdržana glasa, usvojen je Prijedlog Zakona o izmjenama i dopunama Zakona o igrama na sreću.

2. Prijedlog Zakona o poljoprivrednoj organskoj proizvodnji

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Nacrt Zakona usvojen je u Predstavničkom domu 27.10.2015. godine na 3. redovnoj sjednici.

Dom naroda Parlamenta Federacije BiH usvojio je Prijedlog Zakona sa jednim amandmanom koji je Vlada prihvatila pa je postao sastavni dio Prijedloga Zakona.

U ime Vlade Federacije BiH dodatno obrazloženje dala je Sabaheta Čutuk, predsjednica stručne radne grupe.

U ime Odbora za poljoprivredu, vodoprivredu i šumarstvo obrazlagao je Bajro Makić.

U raspravi su učestvovali: Alma Kratina, Amra Haračić, Amra Kunovac, Zijad Alajbegović i Oliver Radoš.

Sa 56 glasova za, uz osam glasova protiv i uz sedam uzdržanih glasova, usvojen je Prijedlog Zakona o poljoprivrednoj organskoj proizvodnji.

3. Prijedlog Zakona o izmjenama Zakona o konsolidaciji rudnika uglja u Federaciji BiH prema obračunatim a neuplaćenim javnim prihodima od 2009. do 2015. godine

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Nacrt Zakona usvojen je u Predstavničkom domu 27.10.2015. godine na 3. redovnoj sjednici.

U raspravi su učestvovali Jasmin Kadić, Jusuf Bubica i Stipo Buljan, sekretar u Federalnom ministarstvu energije, rudarstva i industrije.

Nakon glasanja o Prijedlogu Zakona, Ismet Osmanović je, u ime Kluba zastupnika SDA, izrazio sumnju u rezultate glasanja. Na osnovu pojedinačnog izjašnjenja, sa 49 glasova za, uz 13 glasova protiv i uz 11 uzdržanih glasova, nije usvojen Prijedlog Zakona o izmjenama Zakona o konsolidaciji rudnika uglja u Federaciji BiH prema obračunatim a neuplaćenim javnim prihodima od 2009. do 2015. godine.

4. Prijedlog Zakona o izmjenama i dopunama Zakona o istraživanju i eksploataciji nafte i plina u Federaciji BiH

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Nacrt Zakona usvojen je u Predstavničkom domu 03.02.2016. godine na 7. redovnoj sjednici.

Predstavnik Vlade Federacije BiH dao je dodatno obrazloženje.

U ime Odbora za energetiku, rudarstvo i industriju obrazlagao je Zijad Alajbegović.

U raspravi je učestvovao Jusuf Bubica.

Predsjedavajući je pozvao zastupnike da se izjasne o Prijedlogu Zakona o izmjenama i dopunama Zakona o istraživanju i eksploataciji nafte i plina u Federaciji BiH, koji nije usvojen (42 glasa za, 15 glasova protiv i 10 uzdržanih glasova).

5. Prijedlog Zakona o izmjenama i dopunama Zakona o volontiranju u Federaciji BiH (predlagač: Klub zastupnika SDP) – skraćeni postupak

Prijedlog Zakona razmatrala su nadležna radna i dostavila izvještaje

U ime Kluba zastupnika SDP Elvir Karajbić dao je dodatno obrazloženje.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom zakonu te pozvao zastupnike da se izjasne da li će ga razmatrati po skraćenom postupku, što je usvojeno (51 glas za, 10 glasova protiv i sedam uzdržanih glasova).

U raspravi su učestvovali Dževad Adžem i Mensud Borović.

Sa 57 glasova za, uz devet glasova protiv i uz sedam uzdržanih glasova, usvojen je Prijedlog Zakona o izmjenama i dopunama Zakona o volontiranju u Federaciji BiH.

6. Nacrt Zakona o prijevozu opasnih materijala

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Aljoša Čampara.

U ime Odbora za prostorno uređenje stambeno-komunalnu politiku, ekologiju i turizam obrazlagao je Jusuf Bubica.

U ime Odbora za promet i komunikacije obrazlagao je Enver Bijedić.

U raspravi niko nije učestvovao.

Sa 55 glasova za, uz osam glasova protiv i uz tri uzdržana glasa, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o prijevozu opasnih materija i smatra da može poslužiti kao osnova za izradu prijedloga Zakona.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koji su dostavljeni ili će biti dostavljeni u pisanoj formi.

Dogovoreno je da se objedini rasprava o tač. 7., 8. i 9., a da se glasanje obavi pojedinačno o svakom nacrtu.

7. Nacrt Zakona o Gradu Goražde

8. Nacrt Zakona o Gradu Cazinu

9. Nacrt Zakona o Gradu Livnu

Nacrte zakona utvrdila je Vlada Federacije BiH.

Nacrte zakona razmatrala su nadležna radna tijela i dostavila izvještaje.

U ime Odbora za prostorno uređenje, stambeno-komunalnu politiku, ekologiju i turizam obrazlagao je Jusuf Bubica.

U raspravi su učestvovali Mensud Borović i Elvir Karajbić.

Sa 55 glasova za, uz osam glasova protiv i uz jedan uzdržani glas, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o Gradu Goražde i smatra da može poslužiti kao osnova za izradu prijedloga Zakona. Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koji su dostavljeni ili će biti dostavljeni u pisanoj formi.

Sa 52 glasa za, uz devet glasova protivi uz šest uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o Gradu Cazinu i smatra da može poslužiti kao osnova za izradu prijedloga Zakona. Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koji su dostavljeni ili će biti dostavljeni u pisanoj formi.

Sa 58 glasova za, uz osam glasova protiv i uz jedan uzdržani glas, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o Gradu Livnu i smatra da može poslužiti kao osnova za izradu prijedloga Zakona. Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koji su dostavljeni ili će biti dostavljeni u pisanoj formi.

Elvir Karajbić je, u ime Kluba zastupnika SDP, preložio zaključak o kojim su se zastupnici izjašnjavali.

Sa 52 glasa za, uz devet glasova protiv i uz šest uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH zadužuje Vladu Federacije BiH i resorno ministarstvo da pripreme nacrt zakona za sve one općine koje mogu ispuniti uvjete (30.000 stanovnika i koji imaju 10.000 stanovnika u urbanom dijelu) da se pretvore u grad.

10. Nacrt Zakona o šumama

Nacrt Zakona utvrdila je Vlada Federacije BiH.

Nacrt Zakona razatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dala je Danica Cigelj, pomoćnica ministra za šumarstvo.

Uima Odbora za poljoprivredu, vodoprivredu i šumarstvo obrazlagao je Bajro Makić.

Uime Komisije za lokalnu samoupravu obrazlagala je Mira Grgić.

U raspravi su učestvovali: Kenela Zuko, Emina Mutap, Almir Zulić, Rasim Omerović, Amir Zukić, Asim Kamber i Zlata Turkić, viši saradnik za rad u skupštinskim komisijama i institucijama vlasti u Savezu općina i gradova.

Sa 48 glasova za, uz 14 glasova protiv i uz 13 uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o šumama i smatra da može poslužiti kao osnova za izradu prijedloga Zakona.

Zadužuje se predlagač da provede javnu raspravu u trajanju 90 dana.

Zadužuje se predlagač da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi kao i one koji su dostavljeni ili će biti dostavljeni u pisanoj formi.

Predsjedavajući je prekinuo rad sjednice u 19.40.

* * *

NASTAVAK 12.REDOVNE SJEDNICE PREDSTAVNIČKOG DOMA PARLAMENTA FEDERACIJE BIH, održane 08.11.2016. godine

Sjednica je počela u 11.01.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, potpredsjednike Federacije BiH, članove Vlade Federacije BiH, predstavnike Međunarodne zajednice i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Ljuban Herceg, Mirza Ganić, Vjekoslav Bakula, te ministri Elvira Dilberović i Amir Zukić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zastupnik Dževad Adžem pokrenuo je inicijativu kojom od Predstavničkog doma Parlamenta Federacije BiH traži da obaveže Vladu Federacije BiH da u saradnji sa Vladom Bosansko-podrinjskog kantona Goražde otkloni sve nedostatke i osigura kandidovanje i uvrštavanje Projekta izgradnje brze ceste na relaciji Prača - Tunel Hranjen - Goražde u Program javnih investicija Vlade Federacije BiH za srednjoročni period od 2017. do 2019. godine. Inicijativa nije usvojena (38 glasova za, osam glasova protiv i 23 uzdržana glasa).

Jasmina Zubić komentarisala je odgovore na postavljena pitanja. Nije zadovoljna odgovorom na pitanje vezano uz Dijalizni centar u Visokom. Ponovo postavlja pitanje – šta čine Kantonalna bolnica Zenica i Federalni zavod zdravstvenog osiguranja i reosiguranja da se poboljšaju uvjeti rada u Dijaliznom centru u Visokom. Pitanje koje je postavila Vijeću ministara BiH obnavlja - u kojoj fazi je priprema jedinstvenog programa za usklađivanje propisa sa propisima EU, misli se na Program na nivou Bosne i Hercegovine. Također, komentarisala je i odgovor na pitanje vezano uz Zakon o koncesijama i kazala da se nada sa će ubrzo biti u parlamentarnoj proceduri.

Odgovorima na postavljena pitanja zadovoljni su ili djelimično zadovoljni: Mehrudin Švago, Midhat Karović, Vesna Švancer, Omer Škaljo, Esad Bašagić, Amra Kunovac, Alma Arnaut, Amra Haračić, Saša Mitrović, Šemsudin Kavazović, Damir Mašić, Boris Marjanović, Rusmir Mesihović, Jusuf Bubica, Davor Vuletić i Alma Kratina. Odgovorom nije zadovoljan Enver Bijedić.

Mira Ljubijankić komentarisala je odgovor Fonda za profesionalnu rehabilitaciju i zapošljavanje osoba sa invaliditetom. Traži od inspekcije da provjeri zašto oko 50.000 obveznika ne ispunjavaju obaveze prema čl. 18. i 19. Zakona o profesionalnoj rehabilitaciji. Kazala je da je Fond preporučio izmjenu Zakona, kojom će se kažnjavati javne ustanove i privatna preduzeća koja ne uplaćuju u Fond, odnosno ne zapošljavaju invalide. Radoslav Luburić kazao je da nije dobio odgovor na pitanje koje je uputio Vladi Federacije BiH. Odgovorom na drugo postavljeno pitanje, koje je dobio od Federalne porezne uprave, nije zadovoljan a tiče se broja zaposlenih po nacionalnoj strukturi u Središnjem uredu. Slavica Josipović kazala je da nije dobila sve odgovore na postavljena pitanja. Pitanje koje je uputila premijeru Vlade Federacije BiH a tiče se Nacionalne strategije u Federaciji BiH je ključno pitanje. Smatra da i resorno ministarstvo može dati odgovor. Zamolila je premijera i Vladu da zaduže ministarstva da donesu okvirnu strategiju koju će uputiti u parlamentarnu proceduru. Osvrnula se na pitanje koje svake godine postavlja Vladi i Federalnom ministarstvu finansija - da se zastupnicima dostave pokazatelji kakva je raspodjela budžetskih sredstava, donatorskih sredstava, kreditnih sredstava prema svim kantonima i općinama u Federaciji BiH. Također, koliko se sredstava iz budžeta Federacije BiH usmjerava u budžet prema općinama u RS. Nije dobila odgovor ni na jedno pitanje koje je upućeno Tužilaštvu BiH pa apeluje da odgovori na pitanja u onoj mjeri koliko može informirati Parlament Federacije BiH. Mira Grgić komentarisala je odgovor na pitanje koje se odnosi na efekte zabrane zapošljavanja u ministarstvima i ostalim vladinim institucijama. Jasna Duraković-Hadžiomerović kazala je da je djelimično zadovoljna odgovorima i dala kratak komentar. Jasmin Kadić dao je komentar na odgovor koji je dobio u vezi sa Zakonom o energetskej efikasnosti.

Poslanička pitanja

Nasir Beganović prvo pitanje uputio je Autocestama Federacije BiH a vezano je uz tunel Vijenac. Prilikom svečanog puštanja u promet ovog tunela putnici su imali neophodan telefonski signal, internetsku vezu i radio prijem, međutim, već duže vrijeme ovog signala nema, a ovo je jedna velika i opasna dionica. Izrazio je sumnju u rad i drugih sigurnosnih sistema, te traži odgovor od nadležnih u Autocestama – zašto ovaj sistem ne funkcioniра i kome je u interesu da dovodi u opasnost život i zdravlje putnika na ovoj dionici?

Drugo pitanje uputio je Službi za zajedničke poslove organa i tijela Federacije BiH a odnosi se na Izvještaj o utrošku tekućih sredstava iz rezerve Vlade Federacije BiH za 2015. godinu, gdje se navodi da je za rekonstrukciju Vile Braun utrošeno 105.435,60 KM. Traži da mu se dostavi informacija koji su radovi izvođeni na osnovu te odluke.

Apeluje na resorno ministarstvo i Vladu da pripreme i u parlamentarnu proceduru dostave izmjene i dopune Zakona o visini stope zatezne kamate na javne prihode i da se rok produži i olakša uplata doprinosa. Predlaže da se barem 10% glavnice uplati za naredni period a otpis kamatnih troškova vrši tek nakon posljednje rate duga.

Damir Mašić kazao je da je u oktobru prošle godine Vlada Federacije BiH osnovala društvo sa ograničenom odgovornošću "Intera", čiji je zadatak upravljanje

imovinom u vlasništvu Federacije BiH u zemlji i inozemstvu. Pita – šta se desilo sa tom firmom, da li ona postoji, ko je zaposlen i čime se bavi ta firma?

Drugo pitanje, budući da je u javnosti objavljeno da je nabavna cijena plina 40% manja u odnosu na prošlu godinu, a građani Federacije BiH ne osjete da to smanjenje nabavne cijene plina prati i smanjenje cijene plina u maloprodaji, pitanje upućuje resornom ministarstvu i BH Gasu – šta se dešava s tim, da li su poduzete mjere, da li su smanjenja ulazne cijene plina pratila i distribuciju prema krajnjim korisnicima?

Treće pitanje - zbog čega je Vlada Federacije BiH prepolovila planirana sredstva za sufinansiranje prvog zapošljavanja?

Četvrto pitanje postavio je Federalnom ministarstvu unutrašnjih poslova, Federalnom ministarstvu turizma i Javnom preduzeću Parkovi d.o.o. Ljubuški – da li su oni koji su spriječili ulazak antifašista iz Vogošće u turističko izletišta Kravice sankcionisani, ko su ti ljudi i da li je uopće provedena interna istraga o navedenom incidentu?

Peto pitanje – traži informaciju da li se i koliko puta do sada zadužio Fond PIO i kod koje komercijalne banke, pod kojim uvjetima i da li i u kojim iznosima namjerava to uraditi ubuduće?

Azra Hadžić pokrenula je inicijativu kojom traži od Vlade Federacije BiH, odnosno Federalnog ministarstva zdravstva da preuzme nadležnost nad Studentskom poliklinikom. Traži da Vlada na svojoj narednoj sjednici razmatra ovu inicijativu. Također, traži da se potvrde izdaju besplatno i da na adekvatan način poboljšaju zdravstvenu zaštitu studenata. Traži da predsjednica Komisije za pitanja mladih u što skorijem periodu sazove sjednicu Komisije kako bi se ova inicijativa razmatrala, te da pozove predstavnike studenata kako bi se donijeli određeni zaključci.

Druga inicijativa odnosi se na dodavanje riječi “mladih” nazivu Federalnog ministarstva kulture i sporta.

Pitanje je uputila premijeru i Vladi Federacije BiH – kada će se u parlamentarnoj proceduri naći Strategija za mlade?

Amra Kunovac ukazala je na problem koji imaju stanovnici naselja Buća Potok, Buljakov Potok, Zabrdje, Briješće, Sokolje i Dolac, a tiče se neadekvatnog održavanja deponije. Stanovnicima ovih naselja ugroženo je zdravlje. Pita Federalno ministarstvo zaštite okoliša šta oni poduzimaju po ovom pitanju i da li će dozvoliti da se u Sarajevu desi ekološka katastrofa?

Drugo pitanje odnosi se na Federalni fond za zaštitu okoliša – kakve mjere poduzimaju i da li ih uopće poduzimaju u Federaciji BiH po pitanju kvaliteta zraka. Konkretno misli na Sarajevo, Tuzlu, Zenicu, Kakanj i Lukavac.

Ilhan Bušatlić prvo pitanje uputio je Federalnom ministarstvu energetike, rudarstva i industrije, Direkciji za namjensku industriju i za preduzeće namjenske industrije “Binas” iz Bugojna – zašto se ne uplaćuje radni staž za radnike koji su ispunili uvjete za penziju?

Drugo pitanje uputio je Parlamentu Federacije BiH – koliko je za sedmi, osmi, deveti i deseti mjesec 2016. godine iz budžeta Parlamenta Federacije BiH isplaćeno zastupnicima Predstavničkog doma Parlamenta Federacije BiH za odvojeni život, troškove prijevoza, posjete porodici, paušale, topli obrok i plaće zaposlenika.

Jasmina Zubić prvo pitanje uputila je Vladi Federacije BiH - u kojoj fazi je realizacija zaključka, koji je usvojio Predstavnički dom Parlamenta Federacije BiH na svojoj šestoj sjednici i Dom naroda na svojoj sedmoj sjednici a koji glasi: “Predstavnički dom Parlamenta Federacije BiH nalaže Vladi Federacije BiH da izradi

rebalans Budžeta Federacije BiH za 2016. godinu, iznađe zakonske pretpostavke i sredstva za poboljšanje statusa RVI, paraplegičara 100% prve grupe.”.

Drugo pitanje uputila je Domu Bjelave i SOS selu – koliko je u proteklih pet godina podneseno zahtjeva za usvajanje djece i koliko ih je odobreno?

Treće pitanje uputila je kantonalnim zavodima i Federalnom zavodu zdravstvenog osiguranja – zašto kantonalni zavodi ne poštuju zakonsku odredbu da sve osobe do 18 godina imaju pravo na zdravstveno osiguranje nego zahtijevaju potvrdu o pohađanju škole da bi se ovo pravo ostvarilo.

Četvrto pitanje vezano je uz Zaključak usvojen u Predstavničkom domu Parlamenta Federacije BiH na sedmoj sjednici (3.2.2016.) koji je glasio: “Zadužuje se Vlada Federacije BiH da iz moratorija izuzme Agenciju za reviziju privatizacije i da se pripreme izmjene Zakona o reviziji privatizacije.”. Ovaj zaključak upućuje Vladi Federacije BiH.

Alma Macić prvo pitanje uputila je Federalnom ministarstvu za pitanja boraca i invalida odbrambeno-oslobodilačkog rata – traži da joj se dostave tačni iznosi novčanih sedstava koje je ovo ministarstvo u prvih deset mjeseci 2016. godine dodijelilo boračko-invalidskim organizacijama sa područja HNK? Po kojim osnovama su sredstva dijeljena i da li je bilo prioriteta u isplati? Također, traži da joj se u odgovoru posebno izdvoje sredstva i njihov iznos, koja su uplaćena boračkim i invalidskim udruženjima sa područja Općine Konjic. Da li su aktivnosti primalaca novčanih grantova sa područja Konjica opravdala svoju svrhu i kakva je saradnja boračko-invalidskih udruženja iz ovog grada sa Ministarstvom?

Drugo pitanje uputila je Federalnom ministarstvu obrazovanja od kojeg traži da joj se dostavi informacija o tome koliko je za prvih deset mjeseci 2016. godine dodijelilo sredstava obrazovnim i kulturnim institucijama u HNK i prema kojim kriterijima? Posebno traži iznos koji je izdvojen ili je namijenjen da se isplati na račun Univerziteta “Džemal Bijedić” u Mostaru, imajući u vidu njegovo katastrofalno finansijsko stanje kao i položaj zaposlenih i studenata.

Anela Šestić-Begović pitanje je postavila Federalnoj upravi za geodetske poslove, u ime građana, pa pita šta treba učiniti da se obavi jedna zakonska radnja u smislu cijepanja parcele sa starim katastarskim oznakama i šta treba učiniti da se dobiju nove katastarske oznake? Traži da se putem Parlamenta Federacije detaljnije rasvijetle problemi u zemljišnoj administraciji, harmonizaciji podataka zemljišta na relaciji gruntovnica – katastar na području Federacije BiH jer mnogi građani odustaju od ovakvih i sličnih sporova zbog ogromnih grešaka.

Elvir Karajbić pitanje je uputio Vladi Federacije BiH. Naime Federalno ministarstvo okoliša i turizma je u mandatu 2014. godine u sklopu svojih aktivnosti poboljšanja kvaliteta okoliša iniciralo aktivnosti iskorištavanja toplinske energije iz postrojenja TE Kakanj. Vlada je dala podršku ovom projektu a Federalno ministarstvo donijelo je odluku o subvencioniranju izrade studije opravdanosti u vrijednosti 50% ovog projekta. Budući da su dvije plitičke partije, koje čine većinu, najavile da će oživjeti ovaj projekt i da će Nadzorni odbor Elektroprivrede BiH do 18.5.2016. godine donijeti odluku o daljnjim aktivnostima vezanim uz pitanje grijanja iz TE Kakanj do Sarajeva, traži od Vlade da mu se dostavi zvanična informacija o rezultatima ove studije i daju odgovori – koji su razlozi zastoja i koje su daljnje aktivnosti po pitanju ovog projekta - realizacija ili odustajanje od njega?

Drugo pitanje uputio je Federalnom ministarstvu okoliša i turizma – budući da je okolinska dozvola za pojedine departmente kompanije “Acelor Mittal Zenica” istekla, pita kako je moguće da Ministarstvo još nema nacrt integralne okolinske

dozvole, kada će on biti dostavljen na uvid zainteresiranim stranama i kada se planira izdavanje nove okolinske dozvole za firmu "Acelor Mittal"?

Kenela Zuko je, u ime Kluba parlamentarki, pokrenula inicijativu i traži od Vlade Federacije BiH i resornog ministarstva da u roku 30 dana u parlamentarnu proceduru dostavi Prijedlog Zakona o biomedicinski potpomognutoj oplodnji.

Muhamed Ibrahimović pitanje je uputio Vladi Federacije BiH – dokle je Vlada stigla sa pripremom Zakona o koncesijama i kada će taj zakon doći u parlamentarnu proceduru, kao i prateći dokument koji ide uz njega, a koji bi trebali imati kao registar dobara koji mogu biti predmetom koncesije za šta su zadužena resorna ministarstva.

Jasmin Kadić pitanje je uputio Federalnom ministarstvu za energiju, rudarstvo i industriju - u kojoj fazi je izrada strategije razvoja energetskeg sektora?

Pokrenuo je inicijativu o kojoj bi se Parlament trebao izjasniti a odnosi se na održavanje tematske sjednice na kojoj će se raspravljati o elektroenergetskim projektima Termoblok 7 Tuzla, TE Banovići, Vjetroelektrana Podveležje i drugi započeti projekti.

Adžem Dževad pitanje je uputio ministrici Milićević a odnosi se na ekonomski kod 6141 - grantovi nižim nivoima vlasti, odnosno grantovi finansijski neodrživim kantonima - i napomenuo da je ovo pitanje već postavljao ministrici. Traži od ministrice da donese odluku kojom bi do kraja godine transferisala sredstva Bosansko-podrinjskom kantonu.

Almir Zulić postavio je dva pitanja koja se odnose na situaciju u Rudniku mrkog uglja Kamengrad d.d. Sanski Most. Prvo pitanje upućuje premijeru Novaliću i ministru Džindiću - šta su Federalno ministarstvo energije, rudarstva i industrije, sekretar Stipe Buljan i nadležni voditelj predmeta Odsjeka za rudarstvo Stjepan Mijača poduzeli u vezi sa podnesenim zahtjevima za učešće u postupku i zahtjeva na uvid u spise i dostavljene akte u 2016. godini od Udruženja dioničara RMU Kamengrad i stečajnih povjerilaca i stečajnog dužnika RMU Kamengrad d.d. u predmetu prijenosa prava eksploatacije eksploatacionih polja kamengradskog ugljenog bazena Sanski Most sa privrednog društva RMU Kamengrad d.d. Sanski Most na privredno društvo Lager d.o.o. Posušje? Da li je RMU Kamengrad putem stečajnog suda pozvan i obavješten da se vodi postupak, da li je RMU Kamengrad uopće omogućeno da učestvuje u takvom postupku, te koja su pojedinačna akta donesena i da li su i kada pravomoćna i izvršna? Traži konkretan spisak sa brojem i datumom.

Drugo pitanje uputio je premijeru Fadilu Novaliću i ministru Mati Joziću – šta je poduzelo Federalno ministarstvo pravde i nadležni upravni inspektor u Ministarstvu u vezi sa podnesenim zahtjevom i nakon toga tri požurnice po istom zahtjevu u 2016. godini od Udruženja dioničara RMU Kamengrad i stečajnih povjerilaca stečajnog dužnika RMK Kamengrad d.d. stečaju za upravno inspeksijski nadzor i poništaj akata po pravu nadzora u postupku kod FMERI koji se vodi u predmetu prijenosa prava eksploatacije eksploatacionih polja kamengradskog ugljenog bazena Sanski Most sa privrednog društva RMU Kamengrad d.d. Sanski Most na privredno društvo Lager d.d. Posušje kao jednog od 140 stečajnih povjerilaca te šta je poduzeto protiv odgovornih lica koja više od šest mjeseci ne dozvoljavaju pristup, uvid u spise, te koja su pojedinačna akta donesena? Da li su i kada pravomoćna i izvršna? Traži konkretan spisak sa brojem i datumom. Da li je sačinjen zapisnik o upravnom i inspeksijskom nadzoru i obaviješten podnosilac zahtjeva za inspeksijski nadzor?

Dženan Đonlagić postavio je tri pitanja.

Prvo pitanje upućeno je Vladi Federacije BiH, resornom ministarstvu i Pravobranilaštvu Federacije BiH da ovom domu dostavi informaciju o stanju Terminala Dretelj.

Drugo pitanje je, također, uputio Vladi Federacije, koja je donijela Odluku o osnivanju vlastite firme "Intera", koja bi trebala upravljati imovinom u vlasništvu Federacije BiH u zemlji i van nje – šta je to preduzeće uradilo od svog osnivanja i da li su se vršila određena kadrovanja u tom preduzeću? Dakle, broj zaposlenih i kadrovska struktura unutar preduzeća.

Treće pitanje tiče se Inicijative, usvojene u ovom domu a kojom se Poreska uprava Federacije BiH obavezuje da na kvartalnom nivou dostavlja spisak dužnika o neuplaćenim doprinosima i porezima u Federaciji BiH, te smatra da treba tražiti urgenciju ukoliko oni ne dostavljaju redovno spisak dužnika.

Pitanje je uputio rukovodstvu Doma i traži da se iznađe način da klubovi zastupnika dobiju prostorije za rad i normalno funkcioniranje.

Suzana Franjka Galić pitanje je uputila Federalnom ministarstvu poljoprivrede, vodoprivrede i šumarstva a vezano uz slučaj Ante Šarca i njegove farme koza zaraženih Q groznicom. Obraća se Ministarstvu da radi poticaja proširenja porodičnog gospodarstva i pomoći obnove farme koza postupi po rješenju i ispoštuje zakonsku obavezu, te isplati traženi iznos po navedenom rješenju.

Inicijativu je uputila Federalnom ministarstvu energije, rudarstva i industrije, kojim traži povećanje nakande HEP-a za korištenje vodenog potencijala Buškog jezera.

Mensud Borović prvo pitanje uputio je Federalnom ministarstvu poljoprivrede, vodoprivrede i šumarstva – kolike su stvorene a neizmirene obaveze prema poljoprivrednim proizvođačima u Federaciji BiH za poticaje i kapitalna ulaganja i kada su te obaveze nastale?

Drugo pitanje uputio je Federalnom ministarstvu za pitanje boraca i invalida odbrambeno-oslobodilačkog rata – u kom procentu u skladu sa Zakonom o provođenju kontrole zakonitosti korištenja prava iz oblasti boračko-invalidske zaštite je izvršena revizija po kantonima, koliko je ratnih vojnih invalida u procesu revizije ostalo bez nakande, koliko je ratnih vojnih invalida kojima je smanjen stepen invaliditeta, koliko se ratnih vojnih invalida nakon toga vratilo u prava i u koliko je slučajeva presudom Vrhovnog suda Federacije BiH naložena obnova postupka?

Treće pitanje uputio je Federalnom ministarstvu rada i socijalne politike – koliki je akumulirani deficit Zavoda PIO Federacije BiH i u kojem period je nastao?

Četvrto pitanje uputio je Federalnom ministarstvu finansija – koliko je finansijskih sredstava iz budžeta Federacije isplaćeno za zakup prostorija, smještaj federalnih ministarstava, organa i institucija u zgradi u Alipašinoj ulici 41 u Sarajevu od 1996. do 2016. godine i kome su ta sredstva uplaćena?

Peto pitanje upućeno je Federalnom ministarstvu finansija – koliki je ukupni finansijski aranžman Federacije BiH sa MMF-om na dan 31.10.2016., koji su aranžmani pojedinačno u pitanju, datum kada su odobrena sredstva i iznos odobrenih sredstava, iznos otplaćenih sredstava i trenutni iznos duga po svakom aranžmanu sa MMF-om.

Podsjetio je na inicijativu koju je pokrenuo prije više od dva mjeseca a odnosi se na to da Federacija preuzme obavezu po kreditu Bosanskopodrinjskog kantona na osnovu trećeg stand by aranžmana sa MMF-om i da Vlada i Parlament, svako iz svoje nadležnosti, donese odluke kojim će Federacija preuzeti obaveze po tom kreditu u iznosu 8.700.000 KM i pripadajućim kamatama. Također, kazao je da nije dobio odgovor na pitanje koje je postavio 13.7. (zašto Bosanskopodrinjskom kantonu

nisu doznačena sredstva iz Budžeta Federacije BiH za 2016. godinu sa ekonomskog koda 6141 - Tekući transferi drugim novoima vlasti kantoni i općine).

Zukan Helez pitanje je uputio rukovodstvu oba doma Parlamenta Federacije BiH, Vladi Federacije BiH i resornom ministarstvu a odnosi se na izbor Nezavisnog odbora koji imenuje direktora Federalne uprave policije te u kojoj fazi je imenovanje, da li se stvara stranačka policija, te se osvrnuo na policijske vježbe u pojedinim dijelovima entiteta. Traži da se ubrza izbor i smatra da veliku odgovornost ima i rukovodstvo ovog doma.

Faruk Ćupina pita - da li se u parlamentarnoj proceduri nalazi Prijedlog Zakona o energetskej efikasnosti Federacije BiH i kakav mu je status? Pitanje upućuje Vladi i resornom ministarstvu. Bosna i Hercegovine je članica energetske zajednice a kasni u provedbi obaveza koje se tiču ugovora o uspostavi energetske zajednice zbog čega su blokirana sredstva u sektoru energije. Imajući u vidu važnost ovog zakona te da je usvojen u Predstavničkom domu a u Domu naroda nije, traži informaciju u vezi sa tim.

Naredno pitanje upućeno je Federalnoj upravi civilne zaštite - u kojoj fazi je izrada studije uvođenja operativnog centra 112 na području Federacije BiH, te kada će biti predstavljena javnosti?

Pokrenuo je inicijativu za izradu informacije o nezastupljenosti proizvoda iz Federacije BiH na tržištu RS te naporima federalnih institucija da se aktuelna blokada plasmana navedenih proizvoda na tržište RS obustavi.

Jusuf Bubica pitanje je uputio premijeru Vlade Federacije BiH a odnosi se na neuplaćivanje doprinosa za lične dohotke u Federaciji BiH.

Pokrenuo je inicijativu na jednoj od ranijih sjednica a tiče se izgradnje Centralnog zatvora. Dobio je odgovor od Ministarstva pravde, a traži odgovor od premijera Vlade Federacije BiH.

Alma Kratina pitanje je postavila predsjedavajućem a odnosi se na predugo trajanje aktuelnog sata.

Drugo pitanje uputila je federalnom ministru poljoprivrede, vodoprivrede i šumarstva vezano uz neprovodivost na terenu onoga što je propisano pravilnikom na osnovu kojeg se vrši obilazak gazdinstva a posebno kontrole animalne proizvodnje. Traži od Ministarstva podatak o kapacitetima kantonalnih ministarstava poljoprivrede, vodoprivrede i šumarstva kada su u pitanju ljudski resursi i vozila.

Enver Bijedić prvo pitanje uputio je Federalnom ministarstvu prometa i komunikacija i JP Ceste Federacije a vezano je uz projekt dionice Kladanj – Podpaklenik, odnosno Tunel Karaula. Na toj dionici JP Ceste Federacije BiH skratilo je projekt za oko 1.500 metara i neprirodno izvršilo spoj izgrađene dionice sa magistralnom cestom. Na taj način dovedeno je u pitanje sigurnost saobraćaja na toj dionici. Pita - koliko još teba da se izgubi života da Ceste završe dionicu kako predviđa project, odnosno Zakon.

Drugo pitanje - kada će se završiti zapadni ulaz u Grad Tuzlu?

Mehrudin Švago pitanje je uputio JP Ceste Federacije – da li su dale saglasnost za rekonstrukciju i obnovu benzinske pumpe INA u Donjem Vakufu? Zašto su dozvolili da između benzinske pumpe i glavne saobraćajnice nema pješačke staze? Zašto su dozvolili da se smanji saobraćajna traka iz pravca Bugojna prema Donjem Vakufu?

Belma Pojskić pokrenula je inicijativu prema Federalnom ministarstvu zdravlja i Federalnom ministarstvu poljoprivrede, vodoprivrede i šumarstva da u skladu sa svojim nadležnostima izrade strateški plan za smanjenje prekomjernog

udjela kuhinjske soli i transmasnih kiselina u prehrani radi poboljšanja zdravlja stanovništva.

Pitanje je uputila Federalnom ministarstvu zdravlja – kada će se izjednačiti prava pacijenata oboljelih od plućne hipertenzije na nivou Federacije BiH u smislu dostupnosti njima baznog lijeka Sildenafil?

Mahir Mešalić kazao je da je još u septembru pitanje uputio Federalnom ministarstvu finansija, te ga ponavlja – traži da mu se dostave imena 50 osoba sa ukupnim najvećim primanjima u Federaciji, bilo da su rukovodioci državnih preduzeća ili rukovodioci institucija u Federaciji BiH.

Saša Mitrović pitanje je uputio Vladi Federacije BiH, traži informaciju da li je ministar energije, rudarstva i industrije, budući da je u registru upisan kao osnivač firme TMR, u sukobu interesa?

11. Nacrt Zakona o premjeru i registraciji nekretnina

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

Željko Obradović, direktor Federalne uprave za geodetske i imovinsko-pravne poslove, zbog dorade povukao je Prijedlog Zakona.

12. Deklaracija o osudi govora mržnje

Ova tačka dnevnog reda uvrštena je na prijedlog zastupnice Azre Hadžiahmetović koja se kratko obratila Domu.

U raspravi je učestvovao Jozo Bagarić i kazao da će Kub zastupnika HDZBiH podržati Deklaraciju.

Sa 73 glasa za, uz četiri glasa protiv i bez uzdržanih glasova, Predstavnički dom donio je Deklaraciju o osudi govora mržnje.

13. Prijedlog Odluke o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj (IFAD) za realizaciju Projekta program razvoja ruralne konkurentnosti (RCDP)

Prijedlog Odluke dostavila je Vlada Federacije BiH.

Prijedlog Odluke razmatrala su nadležna radna tijela i dostavila izvještaje.

U ime Vlade Federacije dodatno obrazloženje dao je Vedad Nezirić, šef Odsjeka za zaduživanje u Federalnom ministarstvu finansija.

U raspravi niko nije učestvovao.

Sa 54 glasa za, uz četiri glasa protiv i uz 22 uzdržana glasa, usvojen je Prijedlog Odluke o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj (IFAD) za realizaciju Projekta program razvoja ruralne konkurentnosti (RCDP).

14. Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj (OFID) za realizaciju Projekta razvoja ruralnog poduzetništva

Prijedlog Odluke dostavila je Vlada Federacije BiH.

Prijedlog Odluke razmatrala su nadležna radna tijela i dostavila izvještaje.

U ime Vlade Federacije dodatno obrazloženje dao je Vedad Nezirić, šef Odsjeka za zaduživanje u Federalnom ministarstvu finansija.

U raspravi niko nije učestvovao.

Sa 54 glasa za, uz četiri glasa protiv i uz 24 uzdržana glasa, usvojen je Prijedlog Odluke o prihvatanju zaduženja po Sporazumu o zajmu između Bosne i Hercegovine i OPEC Fonda za međunarodni razvoj (OFID) za realizaciju Projekta razvoja ruralnog poduzetništva.

15. Prijedlog Odluke o davanju saglasnosti na izvještaje:

- **Izvršenje Finansijskog plana Zavoda zdravstvenog osiguranja i reosiguranja Federacije BiH za 2015. godinu (konsolidovani)**
- **Izvršenje Finansijskog plana Federalnog fonda solidarnosti za 2015. godinu (Anex I.)**
- **Izvršenje Finansijskog plana Stručne službe Zavoda zdravstvenog osiguranja i reosiguranja Federacije BiH za 2015. godinu (Anex II.)**

Prijedlog Odluke dostavila je Vlada Federacije BiH.

U raspravi niko nije učestvovao.

Sa 64 glasa za, uz 10 glasova protiv i uz osam uzdržanih glasova, usvojen je: Prijedlog Odluke o davanju saglasnosti na izvještaje: izvršenje Finansijskog plana Zavoda zdravstvenog osiguranja i reosiguranja Federacije BiH za 2015. godinu (konsolidovani), izvršenje Finansijskog plana Federalnog fonda solidarnosti za 2015. godinu (Anex I.) i izvršenje Finansijskog plana Stručne službe Zavoda zdravstvenog osiguranja i reosiguranja Federacije BiH za 2015. godinu (Anex II.).

16. Prijedlog Strategije prometa u Federaciji BiH za period 2016. - 2030. godina

Prijedlog Strategije dostavila je Vlada Federacije BiH.

Sekretar resornog ministarstva dao je dodatno obrazloženje. Kazao je da prihvata amandmane zastupnika Almira Zulića: Amandman I.: Prijedlog Strategije na strani 47. izgradnja brze ceste Bihać – Velika Kladuša – granica Hrvatske dužine dionice 56 km, dopunjuje se tip projekta sa „priprema i izgradnja“, opis projekta „početak izgradnje“ i mijenja se datum završetka i glasi: „2021.“, izvor finansiranja „kreditna sredstva“. Amandman II.: Prijedlog Strategije na strani 47. uvrstiti izgradnju brze ceste Cazin – Bosanska Otoka – linija entiteta, dopunjuje se tip projekta sa „priprema i izgradnja“, opis projekta „početak izgradnje“ i dopunjuje se tip projekta sa datumom završetka mijenja se i glasi: „2030.“, izvor finansiranja „kreditna sredstva“.

U raspravi su učestvovali: Enver Bijedić, Nasir Beganović, Jozo Bagarić, Ismet Osmanović, Boro Krišto, Dževad Adžem, Mensud Borović, Azra Hadžić, Rasim Omerović, Almir Zulić, te sekretar Ministarstva Esad Osmanbegović.

Predstavnički dom, prije nego što je usvojio Prijedlog Strategije sa 63 glasa za, uz pet glasova protiv i uz jedan uzdržani glas, usvojio je sljedeći:

Z A K L J U Č A K

Predstavnički dom Parlamenta Federacije BiH usvaja zaključke Odbora za promet i komunikacije koji postaju sastavni dio Prijedloga Strategije.

Zaključci Odbora za promet i komunikacije koji postaju sastavni dio Strategije:

Željeznice

- Ovaj se dio Strategije zasniva na održivom sistemu finansiranja, a to podrazumijeva sredstva iz budžeta Federacije, sredstva od trošarina na naftu i naftne derivate, te druge trošarinske proizvode, te sredstva koja Željeznice ostvaruju putem sopstvenog prihoda od transporta.

- Željeznički sistem mora ostati jedinstven u smislu da se infrastruktura i operateri ne razdvajaju.

Stalna je inicijativa stranih operaterskih kompanija (pogotovo iz Republike Hrvatske) da se na naše tržište uvedu strani operateri i na taj način bi se uništile Željeznice Federacije.

-Infrastruktura ŽFBiH je 100% u vlasništvu Federacije BiH i tu treba više pomoći u smislu održavanja i izgradnje. Sve pruge u Federaciji su napravljene prije 50 godina i neophodno je izdvajati sredstva za njihovo održavanje, rehabilitaciju i modernizaciju. Takav bi se način višestruko isplatio jer npr. kada bismo elektrificirali svu željezničku mrežu transport roba bi bio četiri-pet puta jeftiniji nego kada se vrši lokomotivama na dizel gorivo.

- Izdvajanja za održivu infrastrukturu.

- Neophodna je informatizacija kompletne mreže zbog ekonomičnosti, a posebno zbog sigurnosti na prugama.

- Budućnost transportnih sistema je u kontejnerskom prometu i za to treba izgraditi kontejnerske terminale u Federaciji BiH.

- Veoma važna stavka je transport nafte i naftnih derivata i u budućnosti treba insistirati da se taj transport vrši željeznicom od Luke Ploče do naftnih terminala (koji su, također, u vlasništvu Federacije), a koji se nalaze u Mostaru, Blažuju, Živinicama i Bihaću.

Ceste

Ovaj dio Strategije ima značajan nedostatak:

1. Način finansiranja daljnje izgradnje autocesta (a i magistralnih cesta) zasniva se isključivo na povećanju trošarina na naftu i naftne derivate, tj. na povećanju kreditnog rejtinga.

Niko nije uzeo u obzir Zakon o privatnom partnerstvu koji omogućuje dovođenje velikih kompanija koje bi izgradile određene dionice autoceste i to na sljedeći način:

Federacija bi odredila koja dionica da se gradi, velike kompanije bi izgradile taj dio i naplaćivale korištenje autoceste određen broj godina (dok ne bi vratile uložena sredstva) i nakon toga bi te dionice predale u vlasništvo Federacije BiH.

Ovaj sistem je poznat i već je u funkciji u mnogim dijelovima Evrope i svijeta i mi bismo trebali raditi na implementaciji takvog dijela finansiranja izgradnje autocesta.

2. U ovoj strategiji dionice Autoceste označene su kao A2 Tuzla - Orašje i A3 Tuzla - Žepče.

Kao izvor finansiranja izgradnje tih dionica navedena su vlastita sredstva.

Na taj način (budući da za takva sredstva treba čekati mnogo godina) te dionice neće biti nikada izgrađene. Ove dvije dionice A2 i A3 trebaju, također, ući u sistem finansiranja izgradnje kao i kompletna dionica Koridora Vc, tj. kreditnim sredstvima i putem modela PPP.

3. Bosanskopodrinjski kanton – vratiti u program buduće izgradnje magistralnih puteva.

Aviopromet

U ovom dijelu Strategije aviopromet Tuzla nije okarakterisana kao zračna luka sa najboljim uvjetima u Bosni i Hercegovini.

Uzletno-slijetna pista dužine 2.400 m je sa obje strane, što znači da i najveći zrakoplovi mogu slijetati u tuzlansku zračnu luku s obje strane piste (dok u mostarskoj zračnoj luci to može samo s jedne strane).

Postoje uvjeti za efikasan i siguran noćni aviopromet jer se treba uraditi modernizacija svjetala za noćno slijetanje. Istovremeno treba istaći da je savremeni uređaj ILS (Instrumental Landing System), koji omogućuje elektronsko navođenje aviona, u funkciji i u skladu sa najsavremenijim svjetskim normama.

- Za ovu zračnu luku predviđena je stavka razvoja samo za kargo promet.

Ako znamo da ova zračna luka ima najveći porast putnika u Evropi treba insistirati na daljnjem razvoju putničkog prometa i omogućiti dobre uvjete i za teretni promet.

Sa 69 glasova za, uz pet glasova protiv i bez uzdržanih glasova, usvojen je Prijedlog Strategije prometa u Federaciji BiH za period 2016.-2030. godina.

17. Izvještaj o odobravanju izdvajanja sredstava iz „Tekuće rezerve“ Budžeta Federacije BiH za 2015. godinu za period 1.1. - 30.6.2015. godine

Izvještaj je dostavila Vlada Federacije BiH.

U raspravi su učestvovali Jasmina Zubić i Faruk Ćupina.

Predstavnički dom primio je k znanju Izvještaj o odobravanju izdvajanja sredstava iz „Tekuće rezerve“ Budžeta Federacije BiH za 2015. godinu za period 1.1. - 30.6.2015. godine.

18. Izvještaj o zaduženju Federacije BiH na osnovu emisije trezorskih zapisa

Izvještaje o zaduženju Federacije BiH na osnovu emisije trezorskih zapisa (6.11.2015., 4.12.2015., 18.12.2015., 15.4.2016., 6.5.2016., 20.5.2016. i 17.6.2016.) dostavila je Vlada Federacije BiH.

U raspravi niko nije učestvovao.

Predstavnički dom primio je k znanju Izvještaj o zaduženju Federacije BiH na osnovu emisije trezorskih zapisa.

19. Godišnji plan zaduženja za 2016. godinu i Kvartalni izještaj o dugu Q4/2015

Godišnji plan i Kvartalni izvještaj dostavila je Vlada Federacije BiH.

U ime Federalnog ministarstva finansija, Sektora za upravljanje dugom dodatno obrazloženje dao je Besim Pašalić.

U raspravi su učestvovali Rasim Omerović i Jasina Zubić.

Predstavnički dom Parlamenta Federacije BiH primio je k znanju Godišnji plan zaduženja za 2016. godinu i Kvartalni izještaj o dugu Q4/2015.

20. Kvartalni izvještaj o dugu Q1/2016

Kvartalni izvještaj dostavila je Vlada Federacije BiH.

U ime Federalnog ministarstva finansija, Sektora za upravljanje dugom dodatno obrazloženje dao je Besim Pašalić.

Predstavnički dom Parlamenta Federacije BiH primio je k zanju Kvartalni izvještaj o dugu Q1/2016.

21. Informacija o vanjskom i unutrašnjem dugu u Federaciji BiH na 31.12.2015.

Informaciju je odstavila Vlada Federacije BiH.

U raspravi niko nije učestvovao.

Predstavnički dom Parlamenta Federacije BiH primio je k zanju Informaciju o vanjskom i unutrašnjem dugu u Federaciji BiH na 31.12.2015.

Predsjedavajući je zaključio rad 12. redovne sjednice Predstavničkog doma Parlamenta Federacije BiH u 15.45.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić

